

摘藻堂四庫全書薈要

集部

欽定四庫全書薈要

集部

御選元詩卷七

詳校官原任主事_臣李斯咏

欽定四庫全書薈要卷一萬八千四百十九

集部

御選元詩卷七

樂府歌行六

李孝光

沂有梁

沂有梁兮維鯉維魴沂之兩厓兮有棗樹桑居沂之人
兮寬裕而善良古之人古之人兮翱翔余其歸老兮沂
之南東



有樊

有樊有樊樹余以蓀胡不蕭艾蕭艾實繁彼繁胡治刈
而為芻嗟人有邑曾不是圖匪余蓀之病余聞有命

君乘馬送彭元亮

君乘馬兮余追於丘君乘舟兮余望於沙遠而不見兮
涉江與淮豈無人兮余望余之所思鴻鵠高飛兮孰知
其志道之將行兮又將焉求

擬妾薄命

妾薄命當語誰身年二八為嬌兒阿母歲歲不嫁女二
十三顏色衰天公兩手搏日月下燭萬物無偏私奈
何醜女得好匹一生長在黃金閨美人如花不嫁人父
母既沒諸兄疑寄書東家小姑道得嫁莫擇君婿好他
人好惡那得知失時不嫁令人老

蓮葉何田田

蓮葉何田田宛在水中央別離不足念亦復可憐生蓮
葉何田田見葉不見水貧賤貧賤交富貴富貴友花生

滿洲渚不復葉田田持身許人易持心許人難

長干行

秋風從西來吹我庭前樹間歡在揚州却憶姑蘇住估客離長干教儂寄書去

一車南送孔博士

一車南一車北山川悠遠無消息野風吹草朝日黃羈旅獨憎絺綌涼男兒生身高七尺何苦相思損顏色西市日日賣鯉魚魚中會有而寄書

吳趨曲送薩天錫

四座並清聽有客歌俠邪俠邪不可聽聽我為爾歌吳
趨美人珠被貂諸于美人寶釵有九雛美人投我明月
珠

采蓮曲送王伯循

采蓮江之南采蓮江之北采蓮何所有但采蓮中惹早
聞別離苦當爾不願從前作相識縱令別離不復相憶
雲之蒸

五日一風十日雨涼著稻花香著土秋風攪縈黃粘天
千家萬家狂欲舞溪頭大笑語向人溪南出雲溪北雨
采蓮曲二首為魯子翬作

采蓮復采蓮蓮生隔江水不愁無舟楫但愁波浪起
采蓮復采蓮水深不得歸兒飢須母哺當令阿誰飴

送且迎

曙月疎星天欲明馬蹄蕭蕭予且行行雖不遠思汝切
重是兄弟難為情星如撒沙天欲暝穉子候門人汲井

還車在郊子復返簷隙持燈笑相領

羽林

公子被我白鼯裘公子遺我明月珠
孤兒假父云姓劉其官高於五諸侯
公子之恩何日酬

大星

大星在天小星落城頭嗚嗚吹畫角
津吏擊鼓河上船行人草草居人憐
男兒隨地弧矢願南北東西君莫怨

桐江

朝取鱸與鮪暮取魴與鰠賦民無令困革盡毛安處我
欲言之大將軍家將軍不見省奈何減民租將軍出乘
大馬入乘高車

東里

葛之漫漫毋敗我垣河水之清毋啗我稻田余甚勞苦
彼黥不知余將遂歸其畬其菑東里之老聞吾言而嘻
余曰歸哉

春草謠為華彥清作

春草何離離春陽何遲遲萬物沐膏澤百草獨光輝
光輝被下土天公本無私男兒生身長大賢知母恩未報
何用兒為何以報母手中線冬溫枕席夏揮扇

龍湫行送軒宗冕歸山

大龍湫小龍湫青天倒瀉銀河流海風吹練白杲杲雪
花滿面寒颼颼詎那大士濯足處碧波下見長黃虯山
僧洗盃白雲動澗猿飲子蒼巖幽神蹤隱見不可測幻
境變化誰能求道人此地昔追遊泠然一息辭神州天

香飄飄滿衣袖散作雨露東南陬老夫送別歌龍湫芙蓉花開溪水頭永嘉妙語猶可續永夜松聲消客愁思君何處寄清夢三十六峯明月秋

太乙真人歌題蓮舟圖

銀河跨西海秋至天為白一片玉芙蓉洗出明月魄太乙真人挾兩龍脫巾大笑眠其中鳳麟洲西與天通扶桑乃在碧海東手把白雲有兩童掣鶚二鳥開金籠

欽硯歌

渴龍夜飲天池水六丁揮戈斷其尾黑風吹落歛山深
化作元精石中髓山深夜夜飛神光良工盜發天所藏
鑿開蒼厓斲寒玉磨礱秋水歸文房元氣淋漓翠光濕
松花香碎蟾蜍泣醉埽郇公五色雲倒鳳顛鸞秋瑟瑟
誰能持此歸玉堂經天緯地成文章月中老兔吹寒芒
與君同上青雲鄉

柳橋漁唱

楊柳橋頭楊柳青西邊即是越王城城中大官聽艷曲

半是美人腸斷聲

周伯琦

詐馬行

并序

國家之制乘輿北幸上京歲以六月吉日命宿衛大臣及近侍服所賜濟蘇珠翠金寶衣冠腰帶盛飾名馬清晨自城外各持綵仗列隊馳入禁中于是上盛服御殿臨觀乃大張宴為樂惟宗王戚里宿衛大臣前列行酒餘各以所職叙坐合飲諸坊

奏大樂陳百戲如是者凡三日而罷其佩服日一
易大官用羊二千馵馬三匹他費稱是名之曰只
孫宴濟蘇華言一色衣也俗呼曰詐馬筵至元六
年歲庚辰泰職翰林扈從至上京六月廿一日與
國子助教羅君叔亨得縱觀焉因賦詐馬行以紀
所見

華鞍鏤玉連錢驄彩翬簇纓朱英重鈎膺障顧輦鏡叢
星鈴綵校聲瓏瓏高冠艷服皆王公良辰盛會如雲從

明珠絡翠光龍蔥文繒縷金紆晴虹犀毘萬寶腰鞢紅
揚鑣迅策無留蹤一躍千里真游龍渥洼奇種皆避鋒
藹如飛仙集崆峒乘鸞跨鳳來層空是時閭闔含薰風
上京六月如初冬金支滴露冰華濃水晶殿閣搖瀛蓬
扶桑海色朝曈曈天子方御龍光宮袞衣玉璫回重瞳
臨軒接下天威崇大宴三日酣羣惊萬羊鸞炙萬甕醲
九州水陸千官供曼延角觝呈巧雄紫衣妙舞腰細蜂
鈞天合奏春融融師獍虎嘯跳豹熊山呼鼉扑萬姓同

曲闌紅藥翻簾櫳柳枝飛蕩搖蒼松錦花瑤草烟茸茸
龍岡拱揖灤水淥當年定鼎成周隆宗藩磐石指顧中
興王彞典歲一逢發揚祖德并宗功康衢擊壤登時雍
豈獨耀武彰聲容願今聖壽齊華嵩四門大啟達四聰
臣歌天保君彤弓更圖王會傳無窮

天馬行應制作

并序

至正二年歲壬午七月十有八日西域拂郎國遣
使獻馬一匹高八尺三寸修如其數而加半色漆

黑後二蹄白曲項昂首神俊超逸視它西域馬可
稱者皆在牴下金轡重勒馭者其國人黃鬚碧眼
服二色窄衣言語不可通以意諭之凡七度海洋
始達中國是日天朗氣清相臣奏進上御慈仁殿
臨觀稱歎遂命育於天閑飼以肉粟酒潼仍敕翰
林學士承旨臣庫庫命工畫者圖之而直學士臣
揭傒斯贊之蓋自有國以來未嘗見也殆古所謂
天馬者邪承詔賦詩題所畫圖臣伯琦謹獻詩曰

飛龍在天今十祀重驛來庭無遠邇川珍嶽貢皆貞符
神駒躍出西洼水拂郎最爾不敢留使行四載數萬里
乘輿清暑灤河宮宰臣奏進閭闔裏昂昂八尺阜且偉
首揚渴烏竹批耳雙蹄懸雪墨漬毛疏駿擁霧風生尾
朱英翠組金盤陀方瞳夾鏡神光紫聳身直欲凌雲霄
盤辟丹墀却閑顧黃鬚圉人服尤詭鞞鞞如縈相諾唯
羣臣俯伏呼萬歲初秋曉靈風日美九重洞啟臨軒觀
衮衣晃耀天顏喜畫師寫倣妙奪神拜進御牀深稱旨

牽來相向宛轉同一入天閑誰敢齒我朝幅員古無比
朔方鐵騎紛如螳山無氛祲海無波有國百年今見此
崑崙八駿遊心侈茂陵大宛黷兵紀聖王不却亦不求
垂拱無爲靜邊鄙遠人慕化致壤奠地角已知天尺只
神州苜蓿西風肥收斂驕雄聽驅使屬車歲歲幸兩京
八鸞承御壯瞻視騶虞麟趾並樂歌越雉旅獒盡風靡
迺知感召由真龍房星孕秀非偶爾黃金不用築高臺
髦俊聞風一時起願見斯世皞皞如義皇按圖畫卦復

茲始

貢師泰

黃河行

黃河水水濶無邊深無底其來不知幾萬里或云崑崙
之山出西紀元氣融結自茲始地維崩兮天柱折於是
橫奔逆激日夜流不已九功歌成四載止黃熊化作蒼
龍尾雙鉤鑿斷海門開兩鄂嶄嶄尚中峙盤渦盪激回
湍衝射懸崖飛沙斷岸決石瞬息而爭靡洪濤巨浪相

喧虺怒聲不住從天來初如兩軍戰方合飛礮忽下堅
壁摧又如豐隆起行雨鞭笞鐵騎驅奔雷半空澎湃落
銀屋勢連渤海吞淮瀆天吳九首兮魑魅獨足潛潭雨
過老蛟吟明月夜照鮫人哭扁舟側挂帆一幅滿耳蕭
蕭鳥飛速徐邳千里半日程轉盼青山小如粟吁嗟雄
哉其水一石其泥數斗滔滔汨汨兮同宇宙之悠久汎
中流以擊楫兮招羣仙而揮手好風兮東來酹河伯兮
杯酒

楊白花

楊白花無定止昨日宮中飛今朝渡江水江水茫茫千萬里綿輕雪薄春旖旎把臂踏歌歌未已石頭城邊風亂起楊白花無定止

學圃吟

江邊乞地學種蔬周遭步量弓百餘十日去耕十日鋤耕鋤未畢僕已痛東家倩人不受呼西家倩人納官租菜苗蟲食且半枯昨朝許有今朝無出門抱甕空躊躇

南隣老圃笑吾迂共倚大樹立須臾手把一卷神農書
口稱此事焉可誣治土貴熟壅貴腴三犂兩耜工力俱
燥濕得所避亢淤田不犂确堅已猶深畦淺壟畫成區
四分井字旁通渠瀏瀏野水翻渴烏然後種藝皆榮敷
寒暑按節順弗踰風和日媚雨露濡水崧山芥菠陵芥
韭黃薤白葱蒨蘇綠葵青藿萑華靚姝藻荇芹茆蘋繁蕪
瓜瓠芡藕苔筍蒲蔓菁蘆服連根株牡丹芍藥萼重趺
茄房豆莢懸瓠壺紫薑紅蓼鬱雕胡玉延蹲鴟巧相扶

皮毛脫迸明月珠長頸短脰膩理膚冰漿雪液如凝酥
翠鱗銀甲虬髯鬚魁首肥顏施丹朱琅玕琥珀鈎珊瑚
饒劇摘掇視密疎多盈筐筥少盈裾削剥淹漬役膳奴
甘膳鱻微薌味殊主莫翼翼賓于于熟可羹毛生可咀
適口絕勝羞仙厨子欲學圃不早圖只今後時將何如
列鼎肉食稱鄙夫魚膾日厭葷與魚請子置之勿次且
褒衣博帶歸爾儒吾計子食當晨晡家園自足供所需
予嗤翁言亦何愚翁實勤苦少暇娛白鬚黑面形瘠癯

曠即胼胝汗輓轡滂即腰脛沒垢汙矧茲惡莖與苦荼
加以臭蒜雜穢萎邪蒿濁莧兼滑榆多食嘔泄神志瘡
得失往往如瑕瑜西伯愛歎垂聖謨大官專膳國以墟
曾皙嗜棗宣尼徒亦有請學譏樊須孤竹采薇終餓殂
屈到好芰竟離居元亮隱菊多令譽諸葛元修名豈虛
陶家薤薤庾家趙黃金不聘蘇東湖是非榮辱理不渝
世間萬物皆乘除翁言固辨亦過諛鄰家有酒且共沽
醉酣仰面一長吁忽見黃鵠翔天衢

關山月送殷文學還浙西

白波洶湧風初起綠煙漸隋冰壺裏林鳥沙鷗寒不棲
萬頃玻璃淨如水攬衣推戶仰視天一寸鄉心幾千里
僕夫在門嚴戒程宵人呼籌催罷更街頭蕭蕭馬初過
城中角角雞亂鳴嗟我亦天涯客握手欲別難為情
遙憐後夜相思處楓葉滄江一船住

吳中曲送楊伯幾南遊

鯉魚風起波紋綠枯葭折蘼啼寒玉榜聲催曉渡江心

幕聽吳娃舊時曲楊郎年少輕別離三尺光芒練帶垂
虎丘山頭候月出靈巖洞口看雲飛梅花雪點身上衣
慈母倚門聽馬歸

灤河曲

椎髻使來交趾國索駝車宿李陵臺遙聞徹夜鈴聲過
知進六宮瓜果迴

白沙岡頭齊下馬為拾闕支八寶鞭忽見草間長十八
衆人分插帽簷前

西湖竹枝詞

葛嶺東家是相門當年甲第入青雲樓船撐入裏湖去
可曾望見岳王墳

芙蓉葉底雙鴛鴦飛來飛去在橫塘人生多少不如意
水遠山長難見郎

採菱女

落日照淮甸中流蕩回光窈窕誰家女採菱在橫塘風
吹荷葉底忽見紅粉妝紅妝背人去驚起雙鴛鴦鴛鴦

去復來煙水空茫茫

朱德潤

和趙李文感栗吟

高堂風露生涼秋興來乘月登西樓
杜寬對客被短褐獨吹感栗驚羣優
移商換羽窮雕鏤篴篥聲不侔
梨園宮人清淚收昔聞此曲供王侯
金花玉管蒼鳳頭當筵呶啞和梁州
緩急應節如解牛清風席上寒飈颼
關山葉落清渭流朝供暮奉何時休
歸來白屋書謾抽

走謁高貴多請求撥刺驚魚度寒湫山空鶴怨中夜愁
時作低韻同羌謳趙公一聞能解憂先生作歌君少留
昔曾天上鈴鏘球翁如鸞鳳鳴丹丘聽之不厭兩耳浮
便當攜君跨雙虬拂衣和曲參天遊

春堤遊子行

燕子社前春雨歇碧堤芳草連天末柳回青眼欲窺人
間關黃鳥初調舌綠窗紅袖開嬋娟誰家高樓入雲端
十二闌干凭欲遍樓前蕩子馳金鞍少年何必生遠圖

金張高貴無時無郎君解作凌雲賦妄效文君當酒壚
只今功名論月俸彎弓射策俱無用十年回首別京華
莫遣春閨生遠夢

吳炳

古意

天河溶溶浮鴛鴦彩雲盤飛戲鳳凰不學朱檻雕籠鸚
鵡鎖白日不學江花碧草翠羽棲炎方東家女兒西家
郎聽歌一曲且停觴玉顏朝好暮醜惡海枯石爛愁人

腸

通通

和西湖竹枝詞

西子湖頭花滿煙
共郎日日醉湖邊
青樓十丈鈎簾坐
簫鼓聲中看畫船

趙雍

春夜曲

去年美人未還家
綠窓青春桃始華
桃華今年只依舊

美人別後長咨嗟芳心欲傳向誰憇卷却羅袖彈琵琶
琵琶聲哀思欲絕衣上啼痕幾時減共君別久胡不來
菱花寶鏡生塵埃君隔楊子江妾居黃金臺臺雖高望
無極人萬里兮天只尺春水綠波春草碧來魚去鴈無
消息日既暮兮月色寒相思如夢彫朱顏青燈炯炯照
不寐攬衣起坐空愁歎

結羊腸

孟春之月春始和陌頭柳色黃如鵝落梅紛紛稍覺多

白日炯炯曜綺羅
曜綺羅日漸長
春風庭院花草香
十六初過上元節
家家女兒結羊腸
含情暗卜心自語
何時得似雙鴛鴦
結成羊腸反斷惆悵
春閨坐長歎強持薄
怒嬌且羞折花倒插
金釵頭

千里思

顏如花膚如雪
秋水雙眸面如月
千里相思不相見
當時却恨輕離別
美人美人顰蛾眉
綠窓寂寂春風微
正山夢斷君何處
化作朝雲縹緲飛

有所思

紛紛落花飄美人在何許相思杳如夢寂寞春朝暮一
別久不見一往久不還相望雖只尺如隔千萬山

趙奕

西湖竹枝詞

湖頭日日水光波兩兩吳娃打槳過笑隔芙蓉不相識
向人猶自唱吳歌

余嘉賓

武夷九曲棹歌

紅韁白馬武夷君羽節來時鶴一羣宴罷虛皇環珮響
手攀霜樹寄彤雲

大王峯影似蓮花石棧緣雲鏤鎖斜擬向紫霄分一曲
便攜雞犬住煙霞

露帶羅衣兩鬢煙芙蓉冷浸九溪澗依稀記得相逢處
曾在玉皇金案前

丹崖翠壁與雲齊瑤草奇花路欲迷三十六峯無馬跡

祇緣巖上叫金雞

大隱屏南天柱峯青天笋立玉芙蓉憑將宇宙支撐住
賜與白雲清淨封

懸崖疊嶂隱書堂澤媚山輝草木香行到源頭清徹處
一溪風月印天光

石室巖扉結構牢仙人掌上綵霞高玉皇朝燕歸來晚
愁見三山起暮濤

蒼玉屏風水曲流滿船絲竹載清秋步隨明月瑤臺去

無數紅雲夜不收

繡衣擬換九霞衣
萬壑雲山玉一圍
仙侶同舟移棹晚
步虛聲裏踏歌歸

王嘉閭

葉敬常祠下歌

北溟波浪幾千里
南山倚石空螺螺
石工未刻厭水犀
石精化作萬丈青
虹霓青虹隨地飲
水不肯去即作葉
侯捍海之橫隄
隄蟠三萬二千尺
盡是南山倚空石
葉

侯驅石應有神抔土丸泥真戲劇舊時天吳上平地幾
處桑田為海水潮來汐去二百年海波還變為桑田隄
成侯去民安土祠下年年間社鼓餘姚編民十萬戶仰
視葉侯如父母侯之去兮不可留桂為楫兮蘭為舟侯
之沒兮神來遊芹香酒旨羅庶羞石隄捍海終不朽侯
德與之同永久南山蒼蒼北海茫茫餘姚之民兮思葉
侯不忘

王餘慶

秋胡妻詞

桑顛日射黃金枝
桑間美人白玉肌
采桑盈筐郎未歸
東風吹淚濕羅衣
郎未歸在遠道
妾尚少兮親已老
郎心如蘖妾如丹
富貴應須到家早
採桑待露晞
養蠶圖得絲生男
且富貴甘旨當及時
千金却為一笑資
倚閭日暮無窮悲
願嫁反哺鳥不忍見秋胡

鄭元祐

花蜨謠題舜舉畫

花魂迷春招不歸夢隨蝴蝶江南飛碧蕤粉香酣不起
臥帖芳茵唾鉛水癡娥眼嬌錯驚顧解屣戲撲沾零露
折釵搔首笑相語阿誰芳心同栩栩顏雲流光空影寒
冰波絨恨啼闌干

竹枝詞

岳王墳西是妾家望郎不見見棲鴉孤山若有奢華日
不種梅花種杏花

青青兩點海門山郎君販鮮何日還潮水便如郎信息

江花恰是妾容顏

葉廣居

西湖竹枝詞

水長西湖一尺過
湖頭狂客奈愁何
鯉魚吹浪楊花落
聽得櫓聲歸思多

孟昉

十二月樂詞

并引

凡文章之有韻者皆可歌也
第時有升降言有雅

俗調有古今聲有清濁原其所自無非發人心之
和非六德之外別有一律呂也漢魏晉宋之有樂
府人多不能曉唐始有詞而宋因之其知之者亦
罕見其人焉今之歌曲比于古詞有名同而言簡
者時復亦有與古相同者此皆世變之所致非故
求異乖諸古而強合於今也使今之曲歌於古猶
古之曲也古之詞歌於今猶今之詞也其所以和
人之心養性情者奚古今之異哉先哲有言今之

樂猶古之樂不其然歟嘗讀李長吉十二月樂詞
其意新而不蹈襲句麗而不惱淫長短不一音節
亦異傍構冥思朝涵夕詠諧五聲以攤其腔和八
音以符其調尋繹日久竟無所得遂輟其學以待
知音者出而余承其教焉因增損其語而隱括為
天淨沙如其首數不惟於尊席之間便於宛轉之
喉且以發長吉之蘊藉使不掩其聲者慎勿曰侮
賢者之言云

正月

上樓迎得春歸暗黃著柳依依弄野輕寒似水錦床鴛
被夢回初日遲遲

二月

勞勞胡燕酣春逗煙微帳生塵蛾髻佳人瘦損暖雲如
困不堪起舞綰裙

三月

夾城曲水飄香埽蛾雲髻新妝落盡梨花欲賞不勝惆

悵東風縈損柔腸

四月

依微香雨青氛金塘閒水生蘋數點殘芳隨粉綠沙輕
襯月明空照黃昏

五月

鉛華水汲青尊含風輕縠虛門舞困腮融汗粉翠羅香
潤鴛鴦扇織迴文

六月

疎疎拂柳生栽炎炎紅鏡初開暑困天低寡色火輪飛
蓋暉暉日上蓬萊

七月

星依雲渚濺濺露零玉液涓涓寶砌衰蘭剪剪碧天如
練光搖北斗闌干

八月

吳姬鬢擁雙鴉玉人夢裏歸家風弄虛簷鐵馬天高露
下月明丹桂生華

九月

雞鳴曉色瓏璵鴉啼金井梧桐月墜莖寒露湧廣寒霜
重方池冷悴芙蓉

十月

玉壺銀箭難傾釭花凝笑幽明霜碎虛庭月冷繡帷人
靜夜長鴛夢難成

十一月

高城迴冷嚴光白天碎隋瓊芳高飲撾鍾日賞流蘇金

帳瑣窓睡殺鴛鴦

十二月

日光灑灑生紅瓊葩碎碎迷空寒夜漫漫漏永串銷金
鳳獸爐香靄春融

閏月

七十二候環催葭灰玉琯重飛莫道光陰似水羲和迂
轡金鞭嬾著龍媒

許楨

瑞蓮歌

太行山下溪名洹洹溪主人今得賢石渠分溜入方沼
種出萬柄紅白蓮就中一茄發挺特豔妝雙出雲髻鬟
有如二女降媯汭翠裙紅袖相牽連岐分駭目未信宿
里間傳耳何喧闐波神有為獻嘉瑞要並太史書豐年
主人謙德不敢有福善自是天行權亭亭植立萬花表
可人適在亭之前日酣欲語轉嬌婉風動似舞尤輕便
一時圖寫溢紈素十日車馬空市廛昔聞蓂莢曾表異

乃因土堦與采椽景星鳳鳥豈常有考信前史真宜傳
醴湖蕪塞不復見而今乃濯圭塘泉禎祥奕葉定不斷
藕絲萬縷相纏綿幽人到此自怡悅膏肓泉石尤難痊
要須紀錄入郡乘千年增重吾山川

曹文晦

采蓮曲

采蓮入南浦欲寄遠方書不知蓮葉下自有雙鯉魚
郎如荷上露蕩搖不成顆妾如蓮中葢苦心思結果

采蓮須采芳不采羞自獻年年來水湄薰風會相見

公無渡河

薰風蕭蕭黃流渾渾上無舟與梁下有鼉與鼉勸公無
渡河駭浪相吐吞惜君只欲留何不聽妾言東趨滄海
湄西極崑崙源浩浩無際流何處招郎魂公無渡河為
郎載歌往者已矣來者多歌兮歌兮奈若何

大堤曲

大堤人家花繞屋大堤女兒美如玉早年不肯習桑麻

日唱花間大堤曲十五豪家作侍姬歌聲送雲雙鴈飛
春衫遍繡紅石竹雲鬢斜插黃薔薇舞倦歌闌三十五
贖身再嫁海商婦海商歲歲入南番空房夜夜相思苦
東鄰女嫁西鄰農夫耕婦織甘苦同百年相守無不足
豈識花間大堤曲

夜織麻行

松燈明茆屋小山妻稚子坐團團長夜緝麻幾至曉辛
勤豈望卒歲衣阿翁幾番催罷機輸官未足私債急妾

身不掩奚足惜念兒辛苦種麻歸依舊懸鶉曝朝日松
燈滅茅屋閉麻盡機空得早眠門外催租吏聲厲

少年行

少年不識愁何物南陌東郊恣遊佚衰老情懷懶出門
坐對青山遂終日向時意氣寧愁老今日方知少年好
北邙多見白楊風三山豈有長生草君不見西山日又
不見西風樹晚霞作態不多時病葉衰紅將委地回頭
為語少年人有酒莫負花間春

春愁曲

春風吹愁花上來美人花下銀箏哀去年花開共春燕
今日花開春夢遠黃鸝紫燕感時鳴亦既見止寧無情
只愁青春不長好名花易落人易老一雙蝴蝶不知愁
東園花落西園遊

行路難

行路難遊說難前車既已覆後車心亦寒宣尼欲歷聘
竟厄陳蔡間儀秦騁雄辯黑貂幾摧殘王陽不能驅九

折薜生禍起三寸舌千古無人弔章亥一言豈盡賢
駸茂行路難遊說難我將焚車深反關不復更思山上
山口中舌在毋翻瀾從渠相見嘲冥頑

楊白花

楊白花風吹渡江去舟人為問去何之不似深宮卧紅
霧宮庭向陽花亂開只愁五更風雨催春心已逐東流
水寄謝舟人勿多語

九曲樵歌十首

并序

錄七首

昔考亭朱夫子作武夷九曲棹歌余少小愛之誦
甚習近登桐柏嶺路盤回亦有九折因仿之賦桐
柏九曲樵歌固不敢較先賢之萬一是亦效顰而
忘其醜也

瓊闕幾幾接太清五雲洞口問長生欲知嶺上無窮景
聽取樵歌四五聲

一曲初過亂石磴兩山松柏翠重重下方樓閣天台觀
坐聽殘陽數杵鐘

三曲天開罨畫屏
松風吹鬢不勝情
山城石甃無蒼蘚
絕愛鏗然放杖聲

四曲峻嶒上石梯
烏巖千仞與雲齊
巖前風起藤花落
一個畫眉松上啼

五曲翻身看晚霞
平川歷歷見人家
桐溪水滙清源出
山似遊龍水似蛇

七曲灣灣翠櫟林
風吹萬葉自清音
行人已在長松杪
回首原田似井深

九曲巖腰坐碧苔吹簫人去有空臺雲深不見來儀鳳
野鳥自啼花自開

高克禮

和西湖竹枝詞

第四橋邊第一灣看魚直上玉泉山大魚已逐龍飛去
留得當時舊賜環

賈榮

和西湖竹枝詞

郎身輕似江上篷
昨日南風今北風
妾身重似七寶塔
南高峰對北高峰

劉肅

和西湖竹枝詞

日出放船水中流
日落風波浪打頭
勸郎移向儂家去
楊柳青青堪繫舟

巴爾斯

西湖竹枝詞

風篁嶺下月色涼無數竹枝官道旁東家為愛青青節
截作參差吹鳳皇

布哈特穆爾

西湖竹枝詞

湖上春歸人未歸桃紅柳綠黃鶯飛桃花落時多結子
楊花落處祗沾衣

卞思義

和西湖竹枝詞

小蘇吹笛最高樓吹作大堤楊柳秋只今青塚在湖上
不識黃雲出塞愁

完澤

和西湖竹枝詞

花滿蘇堤酒滿壺畫船日日醉西湖阿儂最苦兩離別
不唱黃鶯唱鷓鴣

堤邊三月柳陰陰湖上春光似海深遊人來往多如蟻
半是南音半北音

雅克布哈

西湖竹枝詞

湖頭水滿藕花香
夜深何處有鳴榔
郎來打魚三更裏
凌亂波光與月光

徐哲

和西湖竹枝詞

西湖春草碧薦綿
上有青蚨子母全
夜擣守宮和血色
盡將塗上五銖錢

紅塵萬丈長安途碧波三日官亭湖驛路連天水到海
若比相思一寸無

盡說西湖好莫愁不知天上有牽牛騰拚萬斛胭脂水
瀉向銀河一色秋

吳禮

西湖竹枝詞

湖上鴛鴦相對飛春寒著人郎未歸莫捲珠簾看行路
楊花撩亂撲人衣

不愛郎君紫綺裘
不愛郎君珊瑚鉤
永求同生願同死
化作蓮花長並頭

楊慶源

西湖竹枝詞

蘇公堤上草離離
春盡王孫尚未歸
風度珊瑚簾影直
一雙紫燕近人飛

採菱女兒新樣妝
瓜皮船小水中央
郎心只如菱刺短
妾情還比藕絲長

徐夢吉

西湖竹枝詞

雷峯港口晚涼天
相笑相呼去採蓮
莫為採蓮忘却藕
月明風定好回船

王綸

柳橋漁唱

楊柳青白鷗不來
煙水昏落日乘風
放船去顛倒醉眼
包乾坤君不聞西
家急科糶東家重
築城越上良田無

主尋我漁歌發兮君再聽黃金何似一絲輕

楊柳黃秋風一夜蘆花鄉漁釣靜忘周日月公卿不換
漢桐江君不見大官呼領兵小官亦戎行天涯歲晚多
風霜我漁載歌兮情慨慷鑑湖客借賀生狂

朱志道

宗遠先生復入虛白齋余喜承教有日因成短
歌一章

竹林先生陳夫子白髮鬢鬢垂兩耳著書眼似秋月明

為文思入青冥裏近來學得神仙術欲向山中餐石髓
世間自有仙人居何必蓬萊三萬里先生一去竟莫回
我嘗勸之留不止如何擘破山中雲却被茅君強招起

唐棣

和西湖竹枝詞

門前楊柳亂飛花第一橋頭第一家馬上郎君休挾彈
柳枝深處有慈鴉

邊魯

西湖竹枝詞

戴勝降時桑葉青
梨花開處近清明
狂夫歸來未有信
蝴蝶作團飛上城

屠性

和西湖竹枝詞

二八女兒雙髻了
黃金條脫銀條紗
清歌一曲放船去
買得新妝茉莉花

聶鏞

和西湖竹枝詞

郎馬青驄新鑿蹄臨行更贈錦障泥
勸郎莫繫蘇堤柳
好踏新沙宰相堤

宮中曲

九重天上日初和翡翠簾垂午
漏過聞道南閩新入貢
雕籠進上白鸚哥

陳聚

和西湖竹枝詞

茜紅羣子柳黃衣花間採蓮人不知唱歌蕩槳過湖去
荷葉荷花風亂吹

掌吉寶克

和西湖竹枝詞

南北峯頭春色多湖山堂下來棹歌美人蕩槳過湖去
小雨細生寒綠波

楊伋

和西湖竹枝詞

大船槌鼓銀酒缸小船吹簫紅繡窓鴛鴦觸棹忽驚散
荷花深處又成雙

李庸

和西湖竹枝詞

六橋橋下水流東橋外荷花弄晚風郎心似水不肯定
妾顏如花空自紅

黃季倫

和西湖竹枝詞

錢塘江頭莎草齊
錢塘女兒歌別離
願郎相見如月子
月子團團無暗時

湖上女兒猶褐衣
出門日日望郎歸
春水繞湖春草綠
草上雙雙蝴蝶飛

謝寅

和西湖竹枝詞

郎書前月發京華
燕子來時當到家
記得去年栽白苧
郎君繫馬石榴花

祝蕃

南北風歌

南船順水還順風高帆疾過如飛鴻北船逆風還逆水
百丈牽船纔數里南船揮手謝北船不須腸斷南風前
自緣行色有南北未必天心偏順逆明日南風換北風
北船却與南船同

康瑞

西湖竹枝詞

蘇公六橋柳垂堤照見郎君鞍馬肥蜻蜒蝴蝶不相識
各自相憐尋伴飛

南高峰頭雲未開北高峰頭雨頻催為雲為雨幾時了
醉裏相期夢裏來

合歡釵頭雙荔支同心結得能幾時蓬莖有刺郎解折
蓮子有心奴自知

拍湖春水段家橋紫額湘簾碧玉簫橋邊楊柳為誰苦
牽惹風光千萬條

陳高

征婦怨

征夫出門時征婦淚垂垂把酒勸夫飲執手問歸期
期今已過更無消息歸朝朝倚樓望只見鴈南飛

落梅曲

梅花開滿枝無奈曉風吹風吹花落盡爭似未開時
花開終有落非關曉風惡愁殺愛花人城頭復吹角

商婦吟

嫁夫嫁商賈重利不重恩三年南海去寄信無回言妾
身為婦人不敢出閨門縫衣待君返請君看淚痕

啄木鳥

啄木鳥啄樹枝頭紅如血口如錐終日啄木長苦飢木
心有蟲不肯啄天生爾禽復何為吁嗟乎啄木鳥佳木
蠹盡知不知

促織鳴

促織鳴鳴唧唧嬾婦不驚客心悽惻秋夜月明露如雨

西風吹涼透絺苧嬾婦無裳終嬾織遠客衣單恨砧杵
促織促織無復悲鳴客心良苦嬾婦不驚

白頭吟

試聽白頭吟慢飲尊中酒古來悲白頭人情苦難久結
髮為夫妻百年期白首容顏衰落相棄捐何況君臣與
朋友漢高寬大主蕭何開國功讒言一以入幾死天獄
中陳餘與張耳刎頸同生死一朝爭相印讐讐言世無比
周文呂望不再見管鮑結交寧復聞元德孔明若魚水

膠漆孰如雷與陳斯人自此一以少今世求之更無有
談笑尋戈矛那能託身後聽我歌歌白頭勸君飲君莫
愁日月有時而剝蝕世態誰能終不易

折楊柳

折楊柳送別離朝朝送人遠別離門前楊柳折還稀今
年折楊柳來歲復生枝奈何離別子一去無回時

食蓮詞寄同年諸公

曉食盤中蓮忽思水中藕蓮的苦如荼藕甘能爽口甘

苦雖不同同生泥水中得藕薦蓮實采蓮歸藥籠奈何
蓮有韻貴人終不食藕絲雖長難繫蓮蓮抱苦心空自
憐

思親詞

淚滴東甌水思親欲見難水流終有盡兒淚何時乾

楊稷

田家樂

田家樂田家樂樂在堯天事耕鑿大兒北隴種白雲小

兒南澗飲黃犢婦姑談笑課蠶桑深夜寒機響茅屋

甘立

烏夜啼曲

月落城上樓烏啼樓上頭一啼海色動再啼朝景浮馬
鳴黃金勒霜滿翠羽裘烏啼在故處人生多去留

昆明池樂歌

彩鷁齊飛簇畫旗甲光如水入雲低長楊五柞遙相望
笳鼓歸來日每西

昂吉

樂府二章送吳景良

吳門柳東風歲歲離人手千人萬人於此別長條短條
那忍折送君更折新柳枝莫學柳花如雪飛思君歸來
與君期但願柳色如君衣

采采葉上蓮吳姬蕩槳雲滿船紅妝避人隔花笑一生
自倚如花妍低頭更采葉上蓮錦雲繞指香風傳殷勤
裁縫作蓮幕為君高掛黃堂邊待君日日來周旋

金
史
卷
七
柳塘春

春塘水生搖綠漪
塘上垂楊長短絲
美人蕩槳唱流水
飛花如雪啼黃鸝

御選元詩卷七

謹案第七頁後八行鈞天合奏春融融刊本鈞訛
鈞據周伯琦伯溫近光集改

第十一頁後二行治土貴熟壅貴腴刊本壅訛擁
據貢師泰玩齋集改

第十三頁前六行楓葉滄江一船佳刊本楓訛飄
據貢師泰玩齋集改

第三十二頁前七行莫捲珠簾看行路刊本珠訛
朱據別本元詩改

第三十二頁後七行採菱女兒新樣妝刊本女兒
訛兒女據別本元詩改

謹案卷七第六頁後五行濟蘇舊作只孫今改後
仿此 八頁後六行庫庫舊作巉巉今改後仿
此



總校官庶吉士臣侍朝

校對官檢討臣蕭九成

謄錄監生臣劉天倉

欽定四庫全書薈要

集部

御選元詩卷八

詳校官原任主事_臣李斯咏

欽定四庫全書薈要卷一萬八千四百二十

集部

御選元詩卷八

樂府歌行七

王冕

對景吟

濕雲不飛山雪滿
越王城頭鼓聲短
曉來谿上看梅花
虎跡新移大如椀
老烏縮項如凍鷺
呼羣強作嬰兒啼
紅桃翠柳眼欲迷
舊時紈袴今塗泥
淮南千里無煙火



淮東近日多軍馬寸薪粒粟不論錢行客相看淚盈把
如何五陵年少郎賣田去買青樓娼吳歌楚舞不知夜
歸來也學山翁狂明朝酒醒入官府方知不是城南杜
落花風急雨蕭蕭索莫無言面如土

劍歌行

先輩匣中三尺水斬蛟曾入吳潭裏提歸未肯策奇勲
軒冕泥塗真戲耳雞林削鐵不足比昆吾百鍊安能齒
淬花不瑩鵝鵝膏掉箭却敲鸞鳳髓憶昔破敵如破竹

帶霜飛渡桑乾曲於今繡澀渾鉛刀不遇何異荆山玉
驚雷夜作青龍哭血痕冷剝苔花綠野人一見駭心目
到手撫摩看不足雪花皎皎明闌干毛髮凜凜肝膽寒
老軍疲將長慨歎願欲置諸武庫間書生無用且掛壁
引杯時接殷勤歡天眼太高俗眼頑銳鏑宜許兒曹看
先生有志不在此出處每談徐孺子清高厭覓萬戶侯
笑引江山歸畫史我來四十鬢已斑學劍學書俱廢弛
五更聞雞狂欲起何事英雄心未已

金陵行送余局官

李白題詩舊遊處桃花楊柳春無數
六代衣冠委草萊千官事業隨煙霧
大江西下秦淮流石頭寂寞園荒丘
原田每每盡禾黍青山不掩諸公羞
高樓如天酒如海觸景令人生感慨
紅隋香愁燕子飛風流王謝今安在
我欲去尋朱雀橋澹煙落日風蕭蕭
交疏結綺杳無迹但見野草生新苗
小兒紛紛競豪縱區區割據成何用
芙蓉水冷胭脂消千古繁華同一夢
傷今弔古如之何

頭上歲月空蹉跎君行喜有絲五紵宦情不似詩情多
江南故事可知否白雲靈靈變蒼狗休論平生錦機手
浩歌且醉金陵酒

悲苦行

悲風吹茅隨空屋老烏號鳴屋上木誰家男子從遠征
父母妻孥相送哭哭聲嗚咽已別離道旁復對行人悲
去者一心事歸者百感隨前年鬻大女去年賣小兒皆
因官稅迫非以飢所為布衣磨盡草衣拆一冬幸喜無

霜雪今年老小不成羣賦稅未知何所出昨夜忽驚雷
破山北來暴雨如飛湍此時江南正六月酸風入骨生
苦寒東村西村無火色凝雲著地如墨黑瞶翁瞽嫗相
喚忙屋漏牀牀眠不得開門不敢大聲語門外磨牙多
猛虎自來住此十世餘古老未嘗懼此苦我感此情重
歎吁不覺淚下沾裳裾安得壯士挽天河一洗煩鬱清
九區坐令爾輩皆安居

秋夜雨

秋夜雨秋夜雨馬悲草死桑乾路雁啼木落蕭湘浦聲

聲喚起故鄉情歷歷似與幽人語初來未信鬼啾唧坐

久忽覺神淒楚一時感慨壯心輕百斛蒲萄為誰舉山

林豈無豪放士江湖亦有飢寒旅凝愁擁鼻不成眠燈

孤燄短寒花吐秋夜雨秋夜雨今來古往愁無數謫仙

倦作夜郎行杜陵苦為茅屋賦只今村落屋已無豈但

屋漏無乾處凋餘老穉匍匐走哭聲不出淚如注誰人

知有此情苦秋夜雨秋夜雨赤縣神州皆斥鹵長蛇封

豕恣縱橫麟鳳龜龍失其所耕夫釣叟意何如夢入江
南毛髮豎余生聽慣本無事今乃云何慘情緒排門四
望雲墨黑縱有空言亦何補秋夜雨秋夜雨何時住我
願掃開萬里雲日月光明天尺五

江南婦

江南婦何辛苦敝衣零落屢斷腰赤腳蓬頭面如土日
間力田隨夫郎夜間績麻不上牀緝麻成布抵官稅力
田得米歸官倉官輸未了憂鬱腹門外又聞私債促大

家揭帖出陳帳生穀十年還未足大兒五歲方離手小
女三週未能走社長呼名散戶由下季官糧添兩口舅
姑老病毛骨枯忍凍忍飢蹲破廬殘年無物做慈孝對
面冷淚如流珠燕趙女兒顏似玉能撥琵琶調新曲珠
翠滿頭金滿臂日日春風嫌酒肉五侯七貴爭取憐一
笑可博十萬錢歸來重藉錦繡眠不信江南婦人單被
穿

張天英

畫山水歌題米元暉卷

我有山水癖由來好幽棲十年遊雁蕩五年遊會稽或
言秦皇昔時愛仙術驅石下海如鳧鷖洞口誰來劖龍
耳驪珠夜照天雞啼三峯參差九華老蛟龍鼓浪方壺
低醉墨淋漓落吾手咫尺萬里雲淒淒初疑巨靈闢開
翠巖濕馮夷擊碎青玻璃又疑劉阮雙行赤城下漁舟
棹入桃源溪對此長歌發幽思便欲著屐來攀躋我家
碧山最奇絕綠蘿萬丈緣丹梯憶昨金門拂衣去自種

青松與人齊幾人欲畫畫不到惟有四時雲月可以相
招攜吾負碧山此為客何異乎巢由軒冕行塵泥從吾
好歸來兮

曲水詞

羽觴泛曲水水性非自然紆迴白石中玉色何娟娟春
風修竹下清流映羣賢揚波折瑤草遠寄蘭亭前

浣沙曲

溪頭浣沙女素足弄清波綠窓費纖手鳴機不停梭纖

成絺與綌貴之如綺羅持此寄遠客思君心緒多

莫折花

莫折花折花損新枝結根同美好忍此生別離不如坐
花下長醉春風時

烏夜啼

城頭烏夜啼月白薊門時朝陽借光彩翔翔鳳凰池春
風黃金樹結巢在高枝中心懷反哺還向故人飛

柳枝詞

江頭好風日楊柳參差青柔條為君折行歌出西城江
流二月碧如酒木蘭之舟天上行欲別不醉難為情

武陵春曉曲

武陵春曉花冥冥漁歌蘭桹搖殘星溪涵山氣綠如酒
幽禽啼破松煙青天上時間鳳皇曲金門飛夢人初醒
長嘯銀臺月中落空翠著衣香霧薄忽見安期蓬海東
劍佩從風降元鶴陽烏銜火縣扶桑袖卷紅雲朝帝旁
手攬龍車覩天光下視蟻國空千霜

金
庚
巳
月
八
日
卷
八
郭翼

花遊曲和鐵崖韻

石池天地花冥濛芙蓉暖紅旗颭風錦艚兩帆出雲裏
玉灩搖溶養龍水寶坊壁堂山入門瓊琚雜佩飄輕屣
館娃愁絕行春步青孤泣冷鴛鴦墓鐵蛟噴壑風雨來
花宮香送瓊英杯玉粒松膏粉雲盃小扇桃歌紫牙板
芡蘿煙斷東海西雙璫槭札近新題青鳥不來無信使
玉雁銜絲啼十四真珠字密愁滿箋為君重賦花遊篇

春波曲

妾家紅蕖曲綠水春滿滿
鷓鴣不肯飛雙棲落花暖

遊仙詞

銀流萬里海雲東只泛靈查上碧空
仙女踏歌星影裏老龍吹笛浪花中

金粟天南碧殿雲鏡中空影夜氤氲
白鸞樹下三千女一色龍綃玉雪裊

溪水流香飯熟麻洞中千樹玉桃花
金盤日日飛仙供

勅賜安期海上瓜

鬱蕭堂上會神仙
龍燭飛光曉夜然
玉殿歸來環佩冷
白雲猶護古苔篇

麟洲宮殿五雲高
夜赴瑤池宴碧桃
借得仙人紅尾鳳
月中飛影拂波濤

鈞天按樂樂蓬瀛
手把芙蓉朝太清
一曲霓裳羽衣舞
仙家只數董雙成

柳塘春

陰陰覆地十餘畝
娟娟迴塘二月風
雨過鷗眠沙色裏
花飛鶯亂水聲中

行路難

贈君葡萄之芳醇
瑤瑰玉佩之鏘鳴
昆吾鹿盧之寶劍
空桑龍門之瑟琴
紅顏暉暉不長盛
流光欺人忽西沉
願君和樂兮欣欣
聽我長歌行路吟
不見陸機華亭上
寥寥鶴唳詎可聞
朝愁不能驅暮愁
不可處中區何陋
隘乘雲汗漫瑤之圃
爰從王母訪井公
復約元君謁東

父靈桃花開銀露臺玉文棗熟青琳宇我願于焉此中
息錫以遐年永終古

庭前芳樹花參差歲歲爭新滿舊枝開白開紅接芳葉
撩亂二月三月時昔日美人顏似花看花暮去朝復來
紅夾羅襦泣香露青天白日春風吹而今零落少顏色
見花惋惋含悲思百年何人得長好歎息為君君不知

江水詞

江水一百里送君君去時丁寧桃葉渡莫唱渡江辭

江水一百里江流七十盤初三弦上月相憶照彎環

江南曲

江南暄新花月天美人盤遊緩愁年翠環嬌春扶上船
扶上船月如水霞蓋車度花裏

遊女曲

麝衣寶珞花氤氲芙蓉小釵金鵝裙流目艷艷思若雲
思若雲可憐嬌玉條脫金步搖

采蓮曲

金
夕
日
人
之
一
卷八
青溪小姑雙嬋娟蓬蓬荷葉金槳船含情戲采並目蓮
並目蓮為郎喜刺滿莖傷玉指

采菱曲

湖灣小婦歌采菱盪舟曲曲花相迎花開鏡裏搖明星
搖明星妬華月郎不歸怨花發

陽春曲

柳色青堪把櫻花雪未乾宮中裁白苧猶怯剪刀寒
自君之出矣

自君之出矣花開又花謝思君如日月耿耿晝復夜
自君之出矣琴瑟何曾御思君如落葉蕭瑟悲秋暮

明鏡篇

開鏡珠璣匣盤龍百鍊金使君持照妾不解照君心

采蓮曲

蓮子復蓮子苦心郎不嘗為郎剝蓮子蓮子憶空房

汴堤曲

已信堤名汴誰教柳姓楊龍舟行樂地不得復歸唐

王孫曲

春來百種草無那
怨王孫迷却郎歸路
萋萋不斷根

夜夜曲

蕙花空帳不生春
香壁泥紅隋網塵
微步珊珊燈影裏
金屏夜降李夫人

蹋鞠篇

倡園小奴花箇箇
蹋鞠朝朝花裏過
釵墜蜻蜓髻倭隋
髻倭隋玉瓏璫倚嬌樹
雙臉紅

綠雲草色光如苔綵縷紅扇相當開美人凌波蹴月來
蹴月來不隨地袖迴風動羅袂

欵乃歌辭

并序

錄三首

吳興卜者浮舟為家遨遊往來且能道山水之勝
請余言其狀如杜之歌夔州禹錫之竹枝也因製
欵乃新詞五章遺之言固鄙俚不能當古作者然
遠方懷其風俗使歌之亦足樂也

芙蓉城裏繞城開溪月溪煙幾番來駱駝橋頭有酒賣

鷗波亭下棹船回

道場何山山最雄
弁中形勝間吳中
七十二峯菡萏綠
四月五月楊梅紅

上塘船行無斷頭
下塘船少好安流
兩岸青山天上坐
看山吹笛上杭州

湘弦曲

竹啼非染露
山眩乃疑雲
靈瑟傳神語
休令帝子間

征婦怨

君久戍遠磧妾愁在空帷不得如青草隨春上君衣

柳枝詞

濯濯金明柳年年照妾容飛花怨春盡落日渡江風

和鐵崖西湖竹枝詞

采蓮湖上一雙舟白縠風生易覺秋淺淺溪流齊鶴膝
青青荷葉過人頭

四月南風海岸深青旗高高柳陰陰三江潮發來如馬
五兩風搖密似林

江南采蓮曲

涉煙采芙蓉湖波蕩秋影天開明鏡入鳥下青葭響佳
人弭輕楫綠水歌兩兩江南有愁思落日空蒼莽

春愁曲

春陽動宮沼花色明蘭薄文鶯帶柳垂黃蜂粘絮落霓
裳不久舞叢簧愁未炙寧知色易衰祇念思如昨

起夜來

秋生臨水殿月過望仙臺歌吹無聊賴愁吟起夜來

春閨曲

綠樹鶯巢遍紅簷燕語頻
所思猶遠道何用慰芳春

寄衣曲

蠶歲旣已畢鶯時俄復換
早製邊上衣秋來愁緒亂

秋夜曲

玉堦月夜千愁色秋水秋波振草涼
烏柏風高吹肺肺紅蕖露冷墜房房

棹歌行

春江花柳月水色碧草滋嬋媛競遊盤棹歌樂芳時實
珥薰麝蘭羽蓋翔鳬鷺臨流激遺響窈窕飄鶯詞竟欲
整輕橈沂洄往從之落日大江平愴然生遠思

連理樹

堂前好雙樹枝合葉交遮時有鴛鴦鳥來銜並蒂花

張世昌

西湖竹枝詞

奴住西湖日日愁郎家只在淞江頭阿誰移得孤山去

長使江湖一處流

昨夜雨晴溪水深
雞頭菱角滿湖陰
勸君試剝新蓮子
的的中間有苦心

鰯渙

春城曲

柳花吹雪香滿簾
南園草煙迷綠纖
素紗軟屏隔春夢
金翠眉心團小鳳
指怯調笙學鶯語
度曲不成臆酸楚
却把巫山一段雲
剪作春衫寄人去
東鄰郎君馬如雪

青錦短韉裁杏葉背人騎過為誰羞銀黃小袍醉眼纈
花貌越娘秋鬢薄蛾眉學畫初三月

青樓怨

錦樓花霧颺綠塵芙蓉屏深疑淺春微酣著人嬌欲睡
綵雲載夢隔湘水雙螺小娃催理妝粉綿拂拭鸞鏡光
濃黛掃眉桂葉長涼露濯手薔薇香家本石城南市住
早年悔作青樓倡十八梳成金翅髻青蟲簪滑鴉背膩
歌聲繞梁揭塵起細簧咽秋鳳雛語翠綃舞衣珠珮結

研金天鵝銀蛺蝶神女騎龍別楚宮巫雲蜀雨隨峽風
別離何多歡樂少牛女隔河怨秋老黃衫少年下樓去
馬蹄隆隆浩無主

小遊仙詞

玉京侍宴返瑤池西母金輿九鳳幃小隊旌幢三十六
龍聲馬影隔雲飛

何儒行

丹霞篇寄沖妙觀方友

麻姑諸峯插脩翠麻姑仙人鳴玉佩中有道人餌丹霞
採朮餐芝鍊元氣此地昔年我曾遊蒼霞碧樹煙雲秋
仙壇石老苔花幽尋觀怪石獅子踞石屋落日元猿愁
元猿愁白鶴舞相攜乘風凌紫霧琳宮丹闕摩太清下
視人寰隔風雨丹秘金爐深劒藏石匣古揮手接高真
飄飄已遐舉道人笑掬山下泉竹房茶竈搖輕煙天游
之亭據幽勝玉堂寶翰何清妍却登齊雲閣持觴勸明
月明月滿山風滿林醉來清夢欲飛越我無負郭田我

無買山錢一丘一壑肯乞與便須寫我丹霞篇

朱彬

和西湖竹枝詞

湖水東來日欲西
蘭苔參差那得齊
蘇公堤邊人蕩槳
吳山樹頭鴉欲棲

黃公望

西湖竹枝詞

水仙祠前湖水深
岳王墳上有猿吟
湖船女子唱歌去

月落滄波無處尋

吳鎮

招仙詞題高彥敬雲山卷

空山兮寂歷石氣蒸兮龍蔥人家兮水未望鷄犬兮雲
中水流兮花謝淹冬春兮無窮江亭兮石瀨漱靄兮深
松山中兮歸來颯長嘯兮天風

黃鎮成

李將軍歌

李將軍少年意氣輕浮雲青絲絡馬黃金勒寶劍錯鏤
交龍文十二高樓連廣道千金結客大梁門昨日彎弓
連白羽射殺南山白額虎歸來饗士酒千鍾自向青樓
按歌舞前年起兵從義旗斬將陷陣身如飛上功幕府
久未報有酒不樂當何為

悲秋詞

長歎復長歎芙蓉落盡秋水寒庭前百草枯爛死遊子
日暮衣裳單白日悠悠歲將晏江南水深波浪散鴻雁

不來江水長零落秋雲滿江岸願天吹作凌天風吹開
白霧清暘紅願天化作炎天雨物物昭蘇感天語

從軍行

秋風漠漠寒雲低壠頭野雁隨雲飛北方健兒長南土
學得南語相嚶咿羽書昨夜到行府下令急點如星馳
明日橫刀出門去回頭不得顧妻兒山城止舍休十日
百姓餽給無飢疲路上逢人寄書歸道好將息無相思
重關夜度月落早五嶺冬戍天寒遲買羊擊豕且為樂

破賊歸去知何時

李存

古意

秋風一雁過彎弓
登西樓臂弱弓不滿天
高雁難求吁
嗟流沙外風雨何時休
三夜頻夢君焉知
沉與浮况間
霍嫖姚已拜萬戶侯

吳景奎

擬李長吉十二月樂詞

正月

麴塵絲拂晴波暖
霽霽空濛燒痕淺
含章宮中萬玉妃
粉花點額芳霏霏
條風東來初解凍
蝴蝶吹醒花底夢
翠鬟梳罷玉纖寒
綵燕銜春上金鳳

二月

青皇宮中花鳥使
沓翠霏紅教鶯語
移春檻小度芳華
金犢車輕載歌舞
曲房夢斷章臺月
東風不解丁香結
鑰魚夜守倉琅根
海棠飛落臙脂雪

三月

紫簫吹月梨花老
碧雲冉冉迷芳草
藥欄繭栗怯春寒
翠帳流蘇護鶯曉
麗人一去音塵杳
淚灑紅綃怨青鳥
新蒲細柳自年年
曲江流恨波聲小

四月

輕紅流煙香雨足
新槐影轉構欄曲
水晶簾箔度薰風
黃吻烏衣語華屋
涼簪隨髮初破睡
粉痕淺護修蛾綠
並禽不受雕籠宿
背人飛向荷陰浴

五月

網軒綠艾縣飛虎
菖蒲花青海榴吐
江娥倚竹弄湘弦
調笑懷沙怨蘭杜
南薰生涼紈扇薄
雕俎瑤觴勸郎酌
綵索光浮繫臂紗
守宮紅映黃金約

六月

冰山瓏璫間瑤席
水拍銀盤漱寒碧
象牀湘簟含風漪
膩香粉汗霑凝脂
赤帝啾啾火龍老
琪樹西風轉昏曉

七月

鳳皇枝頭一葉飛
碧疏朱綴生涼颼
素紈團團恩愛衰
含宮嚼羽吹參差
瑤階露華霑履綦
星橋月帳愁別離
粉筵歡笑占蛛絲

八月

蘋風夕起涼思多
新愁舊恨生濃蛾
雲兜鷓鴣返故國
瑤階絡緯鳴寒莎
銅山泓泓泣零露
銀灣漾漾吹涼波
素娥徘徊白鸞舞
廣庭老樹今如何

九月

黃金花開香滿把煙草荒臺誰戲馬楚雲櫛櫛雁西流
秋色愴人正瀟灑淚花較較啼新愁纏絃五色彈箏篴
寶香不暖茱萸帳明月空過翡翠樓

十月

小春一花西月黃縞衣美人吹暗香錦衾羅薦曉寒薄
夢中持贈雙明璫霜花莫灑相思樹愁殺孤棲金鳳皇

十一月

八姨手持搏桑枝海天凍合青玻璃瓊樓仙人喚滕六

夜入銀潢剪瑛瑤沉香火暖錦承塵
巨羅羔酒生春粼
宮溝不寄題紅怨日映五紋添弱線

十二月

瓊芳銷歇年華改青鳥無音隔瑤海
綠綃窓戶弄晴曦
柳條迎臘含煙彩上苑花須連夜開
枝頭休剪楊家綵

閏月

若華煌煌縈日馭氣朔盈虛積餘數
低鬟歛黛拜孀娥
孤負團圓十三度生物趨功得歲長
山中獨厄黃楊樹

鵲有媒

長林蕭蕭兩乾鵲
牖戶綢繆欣有託
雄飛望望杳不歸
飲啄應憐隋
曾繳孀雌哺驚成孤棲
月明不復從南飛
迢迢織女隔銀浦
風多巢冷將疇依
花間雙鵲能凸喜
來往殷勤道芳意
雄鳩佻巧鵲不媒
願得靈脩幾同類
斯須衆鵲邀提壺
入林繞樹聲相呼
羣飛盡棄遺一鵲
同室定偶攜諸孤
彊彊和鳴如有道
求牡深慙雉鳴鳴
踰牆鑽穴相窺從
重歎人而不如鳥

胡天游

男從軍

十五束髮去從軍
背劍腰刀別弟昆
男兒不灑臨岐淚
盛策數聲吹出門

雨沐風餐夜枕戈
東征未了北阿河
當年只道從軍樂
誰道從軍苦更多

女從軍

二八女兒紅繡靴
朝朝馬上畫雙蛾
采蓮曲調都忘却

學得軍中唱凱歌

從軍裝束效男兒
短製衣衫淡掃眉
衆裏倩人扶上馬
嬌羞不似在家時

楊花吟

吳江春水拍天涯
江上風吹楊柳花
花飛滿空無處所
隨風直渡吳江水
渡水隨風太有情
縈花惹草恣輕盈
狂如舞蝶穿花徑
細逐流鶯度綺城
綺城樓閣連天際
楊花飛入千門去
飛去飛來稍覺多
紛紛如雪奈君何

珠簾繡箔深深見舞榭妝樓處處過樓中美人春睡起
愁見楊花思蕩子蕩子飄零去不歸楊花歲歲點春衣
夢魂不識天涯路願作楊花片片飛

田家吟

村南村北鳴鷗黃舍東舍西開野棠坡晴漸放桑眼綠
水暖忽報秧牙長老翁躬耕催早起女織男舂婦炊黍
犢兒狂走未勝犁蠶蟻半生猶戀紙一春莫笑田家苦
苦樂原來兩相補君不見踏歌槌鼓肉如山昨日原頭

祭田祖

故人別

故人別新人歸大車小車當路衢路旁把酒相迎送盡
道新人貌更殊故人含笑催上道回頭却向新人笑黃
金不鑄玉郎心送故迎新何日了故人一去無回期新
人還著故人衣玉郎遶牀看畫眉恰似故人初到時

項炯

空井辭

石闌古蘚青蓮錢老梧石罅孤根懸下有一斗琉璃泉
轆轤不鳴修綆斷蛛網濛濛梧葉乾

江南弄

篁深雨過月色青濕螢幾點風穿櫺秋聲滿江龍一吟
江空漠漠懸疎星鳳凰城頭石花吐雷擊老樹蛇骨腥
鬼雄騎黿潮際上暗藤如山走漆燈

潘純

西湖竹枝詞

雲髻高梳鬢不分
埽除虛室事元君
新糊白紙屏風上
盡畫蓬萊五色雲

鄭采

去婦詞

敝衣尚可澣古鏡尚可磨
郎心一昏蔽反覆將奈何
緬懷初嫁時同心指江河
江河固上流郎恩中道休
娟娟芙蓉花托根在芳洲
驅妾出門去妾身將焉求
安得明月珠置之郎心頭

吳克恭

東城行

東城俯春流余昔釣遊地憶嘗拈落蕊相偎倚桃樹葉
底避遊絲叢深納飛絮同時四五輩被服俱美麗千金
各有攜日暮恣遊戲但道長如此焉知老將至昨日尋
舊遊光景徒自媚日肆江海踪漂零復誰記非無桃與
李寂寞千萬億

橫塘曲

妾家住橫塘綠水映垂楊五月南風起何花似藕香

袁藏用

春雨歎

天陰陰晝多雨輕薄陌頭花無數成塵土明朝蕭颯陰
風寒祗恐吹折青琅玕山中嫩人看相倚淚濕翠袖時
難乾

劉原俊

湘竹龍歌

九疑雲深隔煙渚落日湘君泣秋雨江邊老竹餘淚痕
化作神蛟學人語仙人攜至太清家鐵笛黃樓不敢誇
天上鳳臺人未老綵雲聲裏度年華

郭庸

西湖竹枝詞

日落平湖艇子遲岸花汀草伴人歸鴛鴦驚散東西去
惟有蜻蜓蛺蝶飛

流光昨日又今朝猶憶當年醉六橋金鵲翠蕤絲在眼

金定四庫全書
卷八
生綃七尺繫郎腰

盧昇

新嫁娘

新婦調羹湯小姑繡衣裳新婦不停手小姑不下牀新婦語小姑爾亦不自量爾年二八餘寧久阿母旁請看繡針底文彩雙鴛鴦春風一朝起持贈畫眉郎小姑別我去如我事姑嫜

陸繼善

和西湖竹枝詞

手植宜男寄去時
花開灼灼葉離離
芳心不似蘼蕪草
一任春風爛漫吹

沈鉉

放歌贈宋君仲溫

宋君曠蕩士儒服非狂生
筆掃千軍陳胸藏數萬兵
銛毫破紙竟何益
按圖折禦分縱橫
魚麗鳥翼談者易
野雉家雞人目盲
當時管樂已黃土
白壁往往遭蠅營
荒

城不啟塵四塞拔劍斫地浮雲行十年驅走尚豪俠許
人一諾千金輕低頭拜東野捐官識韓荆苦心為知己
嗜膽報仇爭輓輅西入關褰刀從北征途窮亦知時不
利俛首抑氣隨將迎蕭蕭破屋漏星雨妻子顧笑形神
清東家小兒誇褶鞍西家老奴項領成爾獨胡為昧生
理長軀七尺誇人英城頭雨聲如建瓴泥汙厚地天無
晴我留君家醉十日謔浪顛倒呼儂傖請君棄擲几上
筆為君拾留牆角檠眼中世事如轉目勿謂貧賤忘交

情氣酣中熟雙耳赤細語向人肝膽傾玉壺擊缺歌浩
浩不作老腐唧嚶聲促君起望東南氣三台泰階何日
平我有長策君有長纓危可安亂可寧慎勿輕受虞人
旌慎勿虛看處士星丈夫事業須磊落富貴逼君君莫
驚

陸元泰

和西湖竹枝詞

桃花衙口春水波梅花墓下竹枝歌桃花開處春光老

梅花開處月明多

馬稷

西湖竹枝詞

與郎別久夢相思不作西湖蝴蝶飛
化作春深鷓鴣鳥一聲聲是勸郎歸

嚴恭

和西湖竹枝詞

湖中女兒不解愁三三蕩槳百花洲
貪看花間雙蛺蝶

不知飛上玉搔頭

強珣

西湖竹枝詞

湖上女兒學琵琶滿頭都插鬧妝花
自從彈得陽關曲
只在湖船不在家

盧浩

西湖竹枝詞

屋前小松郎手移松高過屋郎未知
願郎歸來莫再別

郎作女羅儂兔絲

馮士顧

和西湖竹枝詞

與郎情重為郎容
南北相看只兩峯
請看雙板橋下水
新開雙朶玉芙蓉

吳復

西湖竹枝詞

西京寄書三載強
錦心織出雙鴛鴦
肯逐大堤楊柳絮

一翻風雨一翻狂

錢大有

西湖竹枝詞

淡黃羣子縷金衫長髻垂肩短鳳簪
不願燕家嫁官去
花枝草蔓自江南

蔣克勤

西湖竹枝詞

題詩秋葉手新裁好似阿儂紅
頰腮寄與錢塘江水上

早潮回去晚潮來

劉景元

和西湖竹枝詞

柳枝裊裊柳花飛
一種春風有是非
柳枝插地根到底
花飛出樹幾時歸

任昱

西湖竹枝詞

儂住湖邊二十年
花開花落任春妍
門前有箇垂楊柳

不著遊人繫畫船

朱庸

和西湖竹枝詞

小姑疑郎去不歸為郎打瓦復鑽龜
青山尚有飛來日不信人無相見時

阮孝思

玉仙謠

赤岸無波海塵起蟠桃枝上花成子
玉仙邂逅赴瑤池

雲角凌空月如水
子子干旌引素霓
白驪蹀躞騁驕嘶
珮環流響入碧落
霧鬢約畧風鬟低
鸞尾金寒歌扇影
銖衣露濕香痕冷
銀漢斜回星彩沈
漸漸扶桑耀初景
齊州九點春微茫
六龍騰駕催晨光
空歌不到碧雲夢
蝴蝶牽愁愁正長
綵霞一滅瓊臺路
想像徒憐薜英暮
青鳥千霜去不還
猶許留情向豪素

韋珪

西湖竹枝詞

蘇小門前月漾波
牽牛織女挂秋河
恨妾如星圓處少
怨郎如月缺時多

李一中

和西湖竹枝詞

阿儂隨郎上釣舟
郎作釣絲儂作鉤
釣絲無鉤隨風蕩
釣鉤無絲隨水流

徐士榮

新街曲

東街南曲聲婉揚西街北曲聲激昂佳人唱曲不下樓
樓下白馬青絲韁昨日開筵擊鼉鼓今夜合席調笙簧
樂聲一似曲聲雜人意豈如物意長祇恐樓上人春光
不長好寧知馬上郎金壁非重寶向來恩愛江水深一
旦殘花與衰草

吳學禮

路傍草

路傍草路傍草古路迢迢生不了百年金谷夕陽天萬

里沙場霜月曉古路今路一樣平踏來踏去重青青
知此草踏又生莫教古路無人行

鄧梓

錦雉圖歌

錦衣繡翼何揚揚棠梨花開春雨香雌雄並立久未翔
咫尺或是山之梁林深枳棘如人長摩挲竹枝思鳳凰
熊進德

西湖竹枝詞

金絲絡索雙鳳頭小葉尖眉未著愁大姑昨夜茗溪過
新歌學得唱湖州

銷金湖邊瑪瑙坡爭似儂家春最多蝴蝶滿園飛不去
好花紅暈到春羅

章善

和西湖竹枝詞

江晚白蘋花正開郎船不用待潮來行人只解隨潮去
不解隨潮郎去回

去年作客向長沙今年書來向三巴恨郎一似楊花性
見郎一似菖蒲花

鄭基

白苧詞送謝叔久

征鴻至征帆舉花發芙蓉滿江渚吳姬約雲歌白苧凝
為朝雲向君舞牽絲鳴玉張宴遲稱觴聽曲心自怡君
之別會有期

雅勒布哈

衡門有餘樂

衡門有餘樂
初日照屋梁
晨起冠我幘
亦復理我裳
雖無車馬喧
草木日夜長
朝食園中葵
暮擷澗底芳
所願不在飽
頗領亦何傷

桐花煙歌為吳國良賦

吳郎骨相非食肉
朝食桐花洞庭曲
洞庭三月桐始華
千枝萬朶搖江綠
吳郎采采盈筐實
之不啻瓊膏粟
真珠龍腦吹香霧
夜夜山房搗元玉
墨成誰共進
蓬萊

天顏一笑金門開
河伯香飛噴木葉
太守噓氣成樓臺
龍賓十二吾何有
不意龍文八吾手
芙蓉粉暖玻璃匣
雲藍色映彤墀柳
玉堂退食春晝長
桃花紙透冰油光
筠管時時濡秀石
銀鈎歷歷凝元霜
君不聞易水先生
號奇絕落紙三年
光不滅又不聞元
香太守烏玉玦坡
老當年書桺葉惜
哉唐李不復見吳
郎善保千金訣烏
乎吳郎善保千金
訣

余闕

白馬誰家子

白馬誰家子綠轡縵胡纓腰間雙寶劍璀璨雪花明甫
出金華省還歌五鳳城君王賜顏色七寶奉威聲夜入
瓊樓飲金尊滿繡楹燕姬陳屢舞楚女奏鳴箏慷慨顧
賓從英風四座生一朝富貴盡不如秋草榮黥婁固貧
賤千載有餘名

長安陌

浩浩長安陌瓊樓夾廣厦鴛鴦御溝上芍藥吹樓前駿

馬追韓嫣金尊約鄭虔功名有時有且得樂當年

可惜吟

春風吹人上妝樓樓頭畫眉望池州平生倚君似山海
十年不見胡不愁東家買紅聘小女西家迎鸞夜擊鼓
眼看拾翠同年人今又堂堂作人母良人良人固家貧
妾身侍君亦苦辛只愁明鏡生白髮有錢難買而今春
此心懸知燕堪託裁書繫渠左邊脚願將妾言入其幕
纈紋資裴亦不惡

鄭玉

覆船山樵歌

家童礪

路入黃茅劒斷蛇疎籬石礪野人家
山深地冷春難老
五月巖前見落花

響泉

歷盡崎嶇上碧岑
高山流水似鳴琴
何須水樂尋幽洞
自有巖前太古音

金婆店

常憶當年武肅王金婆店裏月華光
山中十月桃應熟
未薦仙人不敢嘗

楊椿

和西湖竹枝詞

郎去天涯妾在樓
西湖楊柳又三秋
郎情莫似潮頭水
城北城南隨處流

堵簡

和西湖竹枝詞

港上蘋蒲翠葉齊
鳬鷗鴻雁總來棲
勸郎得意且行樂
白苧尊前日易西

陳肅

輕薄篇

華駒細犢小香車
城南陌上問倡家
倡家窈窕可憐妾
石榴裙裾飛蛺蝶
零陵酒熟正宜嘗
嬌歌一曲雙斷腸
歛笑含顰背花燭
眼意拂君君暫宿

相逢行

吳王城上啼春鴉
吳王宮前多落花
粉翠三千掩佳麗
珠貂十萬歇豪華
昔余好遊錢塘里
亦復結客來吳市
炙魚插匕嗟盜雄
下馬投金想公子
浩歌長嘯出閭門
逢君意氣在一言
解余芙蓉之寶劍
勸君葡萄之玉尊
余從山東入燕趙
身歷河陽抵豐鎬
當時然諾激肺肝
今日還過盡懷抱
風塵瀕洞生干戈
世上英雄本不多
男兒慎勿憂富貴
富貴逼人將奈何

李介石

和西湖竹枝詞

春暉堂前挽郎衣
別郎問郎何日歸
黃金臺高倘回首
南高峰隱白雲飛

潘伯修

君子有所思三首

海日蕭條雲雪岡
追鋒百里逐天狼
雲羅四面伏不動
金錯旌竿風簸揚
侍臣結束鴻雁行
玉階鳴鞘立翠黃

君子有所思
琯弓既報姑置之

天青海綠黃金閨
明星繡戶弱柳迷陽春
從中蕩八極
花迎劒佩黃鳥啼
萬方獻壽來侏鞮
吉雲寶露樽桑西
君子有所思
羽觴重持姑置之

黃衣灑埽明光宮
銀牀玉井牽銅龍
風簾如煙不可極
水殿晚立秋芙蓉
美人吹笙明月中
曲臺央央蘭露紅
君子有所思
雲和欲御姑置之

麥青青

大麥青青三月中東鄰欲盡西鄰空幾人忍死待麥熟
麥方掉頭搖晚風嗟來麥語汝天已一月雨麥今不自
保況乃未秋先易主豈不聞二月賣新絲麥苗典盡秋
無期

吳訥

李將軍歌

太倉積粟皆紅腐羣猫晝眠鼠變虎前鋒不見李將軍
何人為發千鈞弩去年吾從昱嶺來匹馬馳突三關開

北平未入衛青幕郭隗獨上燕昭臺近聞西府羅俊彥
人人自謂能酣戰誰似當年背水軍赤幟纔臨趙城變
英雄報國如等閒馬革裹屍銅柱間明朝按劍收中山
謗書慎勿回天顏

陳謙

遊子吟

母愛兒比瑤草百花原頭春浩浩結綠懸藜總非寶朝
居目前暮懷抱頃刻相違作憂惱兒兮勸爾毋出遊忍


金 卷八
令母心日夜憂紉衣一針一度鉤針線不比心綢繆兒
喜鬪草拈春縷綠縵青蔥不堪數楚人只解歌王孫萋
萋乃有子母恩徂徠松淇園竹人生長生勝他木千年
萬年春草綠

御選元詩卷八

謹案第七頁後七行字蘿煙斷東海西刊本蘿訛
羅今改

第二十三頁前四行感篲數聲吹出門刊本篲訛
栗據胡天游傲軒吟藁改





總校官庶吉士臣侍朝

校對官檢討臣蕭九成

謄錄監生臣劉天倉